

Date – 11/07/2025
Time - 7:30 -7:40Hrs
AKASHVANI AIZAWL

HEADLINES (MORNING)

1. Myanmar ramria inkahna thleng avanga sahimna zawnga Mizoram rawn beltu, Champhai District chhung khaw hrang hrangah Salvation Army chuan chhawmdawlina thilpek a pe.
2. Lungleiah Agriculture & Farmer Welfare Deptt bultumin National Mission on Natural Farming 2025-26 khuhhawn a ni.
3. Sawrkar laipui chuan Mizoram tiamin tuilian leh leimin tuar state parukte tan cheng vaibelchhe 1066 chhawmdawlina pek a remti.
4. Ramchhunga sangha thar chhuah chu kum 11 chhungin a letin a pung.

<><><>

MYANMAR REFUGEES

Tunhnai Myanmar ramria inkahna thleng avanga sahimna zawnga Mizoram rawn beltu, Champhai District chhung Zokhawthar, Saikhumphai leh Vaphaia raltlante tan nimin khan Emergency Relief & Disaster Services, Salvation Army, India Eastern Territory (IET) chuan chhawmdawlina thilpek hrang hrang a hlan.

Salvation Army, India Eastern Territory team, Zokhawthara chhawmdawlina hlantute hi Cabinet Secretary for Programme Administration Col Lalliankung, chuan hovin raltlante tan Buhfai Quintal 10, Dal Quintal 8, Tel Case 15 leh Chi Quintal 1.5 te chu Zokhawthar YMA kutah an hlan a. Heng bakah hian Sahbawn, Sanitary pad, Toothbrush leh Tooth paste-te mimal hnenah an sem bawk.

Nimin vek khan Social & Emergency Secretary Major Lalhmingthanga, hovin Vaphai leh Saikhumphai raltlante tan chhawmdawlina thilpek hrang hrang- Buhfai Quintal 10, Dal Quintal 8, Tel Case 15 leh Chi Quintal 1.5 te chu Vaphai YMA kutah an hlan a. Sahbawn, Sanitary pad, Toothbrush leh Tooth paste-te mimal hnenah an sem chhuak nghal bawk.

<><><>

GOVERNOR

Larsap Gen (Rtd) VK Singh-a'n Indian Red Cross Society(IRCS) Mizoram State Branch tharthawhna hun nimina Govt. Aizawl College, Mualpuia neihahh hmanpuiin, hmalakna kalpui tur a tlangzarh.

IRCS Mizoram State Branch President ni bawk, Larsap Gen (Rtd) VK Singh chuan he hun hi Mizoram tana hun pawimawh tak, mahni mihring puite tana rawngbawl kawnga hmalakna awmze nei leh intuaitharna a ni, a ti a. Mizoram chu tlawmngai pawl chak leh viak tha tak tak awmna a nih thu sawiin, engmah phut let nei hauh lova midangte puih duhna thinlung chu Mizo nuna bet tlat a ni a ti a, puih ngai an awm apianga khawtlang huapa chet chhuah a ni thin chu chhuanawm a tih thu sawiin, midangte rawngbawl sak kawnga khawvel puma pawl hriat hlawh leh awmze nei taka kalpui, IRCS Mizoram State Branch hmang hian Mizoram mipuite chuan rawngbawlana an tichak lehzual thei dawn a ni, a ti bawk.

IRCS Mizoram State Branch Chairman Pu H. Lalengmawia pawhin he hunah hian thu sawiin, Mizoramah Red Cross Society changtlung leh nung tha tak nei tura hmalak chhoh mek zel a ni a ti a, College hotute chu Youth Red Cross Unit din tura tan la theuh turin a chah a ni. Programme hman zawh hian Mizorama Youth Red Cross Unit ding hmasa ber, Govt. Aizawl College Youth Red Cross Unit member-te tana buatsaih, Basic Life Support (BLS) leh First Aid Training session neih zui nghal a ni a. Govt. Aizawl College Youth Red Cross Unit-te hian IRCS Mizoram State Branch atangin blanket 30 leh Oxygen Concentrator an dawng a ni.

<><><>

LUNGLEI NATURAL FARMING

Lungleiah Agriculture & Farmer Welfare Deptt bultumin nimin khan National Mission on Natural Farming 2025-26 khuhhawanna hun hman a ni.

He hun hi Lunglei Dist Agriculture Officer Pu VL. Hmangaihchhunga chuan kaihruaiin Sorkar laipui Programme pawimawh, Natural Farming hmalakna tur hi Mizoram ah hawng hmasaber chu Lunglei a ni a ti.

He hun hmanpuitu Lunglei HPC Vice Chairman Pu V.Malsawmtluanga Mizoramah a hmasaber atan Natural Farming project hawn a ni ta chu lawmawm a tih thu sawiin thlai chin leh lo neih lamah sorkar pawhin tan a la chho zel dawn tih sawiin puih tlak lo neitu te chu Sorkar in a pui zel dawn a, fur leh thal a lirthei kal nan link road zawng zawng PCC a siam tum a ni a ti a, Nghasih zauah Electric pawh luh turin ruahman mek a ni a, Tlawng zauah pawh pawh luh tum a ni a ti. System mumal tak nen a kal chuan sorkar hnathawk lian tak tak ai pawhin sum a lakluh tam theih zawk tiin loneitu te a fuih.

He hunah hian Henry Sap Lalrinliana, Sr Scientist KVK chuan Natural farming awmzia sawiin khuanu lo duan tawhsa, leitha damdawi leh chemical tel lova thlai enkawl a ni tih sawiin hetiang thlai hi mihring tan pawh a hrisel a ni a ti.

Chawhnu lamah mithiam ten Natural Farming awmzia leh thil pawimawh dang an zirtir a, loneitu engemawzah an kal khawm a ni.

<><><>

BJP MIZORAM

BJP Mizoram chuan Autonomous District Council chungchanga Governor thuthlukna, State Cabinet Minister lo ni tawh ten Press Conference meuh kova an sawisel an la hre ngailo an ti.

Chakma Autonomous District Council Governor's Rule-a dah chungchanga Home Minister Pu K. Sapdanga'n Larsap thutlukna demna thu a sawi chungchangah BJP Mizoram chuan nimin khan Press Conference kovin, hei thil Mizorama la thleng ngai lo a ni a ni an ti.

BJP National Minority Morcha Secretary Pu Delson Notlia, MDC chuan tuna CADC chungchanga Governor thuthlukna chu zahawm an ti a, CADC huamchhunga Civil Society Organisation te duhdan ang thlapa kalpui a ni chu mipui zahna dik taka an ngaih thu sawiin CADC mipuite ngenna angin Inquiry Commission din se, sawrkar kalta a eirute leh thil diklo ti zawng zawngte chhuitir a, a mawhphurtu te chu dan anga hrem ngei ni se an duh tih a sawi a ni.

Pu Delson Notlia chuan CADC chu India rama Autonomous District Council 10 zingah a buai zing bik hle tih sawiin, CEM an thlak zin bakah eirukna leh sum indaih lohna a nasat avangin, financial emergency hial puan a ngai a, hei vang hian CADC-a tlawmngai pawl lian pathum- Young Chakma Association (YCA), Mizoram Chakma Student's Union (MCSU) leh Chakma Mahila Samiti (CMS) te chuan inthurualin, Governor hnenah CADC kal dan tha an tih loh avangin CADC thiata, an tih dik lohte chhui turin an ngen a ni a ti. Governor chuan CADC dinhmun chu uluk taka a en hnuaa a enkawl na hnuaia awm tul a tih avangin India Constitution in thuneihna a pek angin tun thla July ni 7 khan Governor's Rule ah thla 6 chhung a dah phawt a ni a ti a. Hemi chungchanga Home Minister Pu K Sapdanga'n thuthar thehdarhtute kova, Governor thutlukna siam chu mipui rorelna palzutna ang nia a sawi te, Governor chu Politics a inbeihna atana a hmang te, BJP tan ang a Governor a puhna te chu Mizoram BJP ten an dem thu sawiin, Mizoram BJP chuan CADC chungchangah hian Governor-ah ngaihdan an thlen lo a ti a, tunhmaa MNF leh Congress sorkar lai pawhin Mizorama Governor lo awm tawh te chuan ADC te chungchangah thutlukna an lo siam fo tawh thin bakah Governor demna thu sawi chu Mizoramah a la thleng ngai lo a ni a ti.

Nikum December thla khan tuna sorkarna chang mek ZPM Chief Minister leh DC&MA Minister te chuan Governor hnenah CADC chu thiah mai tha an tih thu an lo thlen tawh laia, ZPM-in CADC-ah thuneihna an chan

hnua Governor's Rule a dah a nih an hrethiam leh thei lo chu mak an tih thu an sawi bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



AIZAWL DISTRICT CRIME REVIEW MEETING

Aizawl District chhunga Police Station hrang hrangah kumin January atanga June thla chhungin thubuai 818 ziahluh a ni a. Thubuai ziahluh atangin inrawk leh rukrukna a tam ber a, za zel a sawmruk leh panga a tling a ni.

Ni hnih chhung awh tur Aizawl District Crime Review Meeting, SP, Aizawl Conference Hall-a nimina neih tanah he thu hi tarlan a ni, Aizawl Dist-a rukruk thubuai za zel a sawmpali chu lirthei ruk thubuai a ni a. Thubuai ziahluh tawh zing a 107 chu Court-in chingfel tawhin heng zinga za a sawmriat leh pakua 89 ah thil tisualtute thiamloh chantir an ni bawk.

Rampuma Dan thar (New Criminal Law) nikum July ni 1 atanga hman tan chu mipuite hnena hrilhhriat leh zirtir hna nasa takin kalpui a ni tih meetingah hian tarlan a ni a. Ruihhlo laka mipuite, abik takin thalaite an him theih nan Drugs Awareness Campaign a buatsaih thin a. Hursualna leh hleilenna laka hmeichhiate leh naupangte an him theih nan inzirtirna hun vawi tam tak buatsaih a ni tih tarlan a ni bawk.

Kumin chhung hian Dan lova Mizoram lut ILP nei lo emaw ILP dik lo a lut te vawi 41 enfiah tawh niin, dan bawhchhia mi 195 chu man an nih hnua thuneitute hnen a hruai an ni tawh. Lirthei ruk Mizoram pawn a kalpui leh hralh a nih loh nan Police Station hrang hrangin zan lamah lirthei veivak endik hna an kalpui thin. Aizawl khawpuiah inrawk leh rukrukna laka mipuite kan him nan leh suahsualna hrang hrang laka mipuite venhim nan Police Station hrang hrang pali (4) te chuan an area theuhah zantin Police Patrolling an nei thin a, tunlai hian Police Patrol hi team 10 ah inthenin Aizawl khawpui hmun hrang hrangah zantin tlaivarin an duty thin a ni.

Aizawl khawpui chhunga Police Station hrang hrangte chuan Central Equipment Identity Register portal chu mobile phone bo chhuichhuah nan tangkai takin an hman mek a. CEIR kaltlangin mobile phone bo 284 lai chhuichhuah niin, hengte hi mobile phone neitute hnenah hlan leh an ni. A ti tha ber Bawngkawn Police Station in CEIR kaltlangin mobile phone bo 143 chhuichhuak tawhin, a dawttu Aizawl Police Station mobile phone bo 104 an chhuichhuak tawh a. Mobile phone bo chhuichhuah kawngah hian Const Ramengmawii, Bawngkawn Police Station chuan thla 4 chhung lekin mobile

phone bo 120 a chhuichhuak a ni. A hna thawh that avang hian vawiin khan chawimawina reward hlan a ni bawk.

<><><>

DISASTER RELIEF

Sawrkar laipui chuan Mizoram tiamin tuilian leh leimin tuar state parukte tan cheng vaibelchhe 1066 chhawmdawlna pek a remti. Heng state te hi Assam, Manipur, Meghalaya, Mizoram, Kerala leh Uttarakhand te an ni a. Union Home Ministry sawidanin Mizoram tan cheng vbch 22, Assam ah cheng vbch 375, Manipur tan cheng vbch 29, Meghalaya tan vbch 30, Kerala tan vbch 153 leh Uttarakhand tan cheng vbch 455 chuang pek a remti a ni. Heng state parukte hi fur ruahsur nasa, tuilian leh leimin avanga harsatna tawk an ni a. Sawrkar laipui chuan heng state te hi theihtawpa chhawmdawl a tum thu a tarlang a ni.

<><><>

FISH

Ramchhunga sangha thar chhuah chu kum 11 chhungin a letin a pung a. Nimin khan Union Minister for Fisheries, Animal Husbandry and Dairying Rajiv Ranjan Singh chuan Bhubaneswar-a Fish Farmers Day hmannaah he thu hi sawiin Kum 11 kaltaah tonne nuai 95.79 thar chhuah anih laiin tunah chuan tonne nuai 195 thar chhuah tawh a ni a. Sawrkar laipuiin sangha thar chhuah lama inthak danglamna tur hmalakna a kalpui rahchhuah a nih thu a sawi a ni. Fisheries leh aquaculture ah zaa 140 in hmasawnna a thleng a ti a. Tuifinriat atanga ei tur tharchhuah Seafood rampawna thawnychhuah hlut zawng chu cheng vaibelchhe sing 6 leh 500 anih thu sawiin khawvelah India chu kaikuang thawnychhuak hnem ber anih thu a sawi a ni.

<><><>